

佛說羅云忍辱經

西晉沙門釋法炬譯

阿難曰吾從佛聞如是一時佛在舍衛國祇樹給孤獨園時鷲鷲子與羅云俱以平旦著衣法服執持應器入城求食時輕薄者遙見兩賢意念曰瞿曇沙門第一弟子與羅云分請即興毒意取地沙土著鷲鷲子鉢中擊羅云首師見羅云血流汗面師曰爲佛弟子慎無含毒當以慈心愍傷衆生世尊常云忍者最快唯慧者能聞佛說誠終身不邪吾自攝心以忍爲寶恣心履惡猶自投火貢高自見愚者謂健不計殃禍當還害已恣心之禍重於須彌首戴須彌畢已年壽以當惡罪十六分中未滅其一愚人作行惡向清淨持戒沙門猶若逆風把炬火行狂愚不捨必自燒身

弊人懷毒自以爲慧如比丘沾沙門四道爲佛弟子常當伏心惡至即滅勇中之上天神帝王雖謂多力不如忍惡其力無上羅云見血流下交面臨水澡血而自說曰我痛斯須念彼長苦斯人惡斯地亦惡奈無愠心悲奈彼何佛是吾尊教吾大慈狂悖之人志趣殂虐沙門默忍以成高德殂者狼殘愚人敬焉沙門守忍狂愚是輕斯人惡我焉能慈濟輪轉無際豈一面乎吾欲以佛至真之經喻誨愚惑猶以劒割彼臭屍屍不知痛非劒之不利乃死屍之無知以天甘露食彼溷猪猪捨之走非甘露之不美乃臭蟲之所不珍矣以佛真言訓世嬰愚不亦然乎師徒俱還飯竟澡浴洗手漱口俱到佛所稽首佛足鷲鷲子退坐具以本末向佛陳之世尊告曰夫惡之

第六

十二

興興已之衰輕薄者命終至于夜半當入無擇地獄之中獄鬼加痛毒無不至八萬四千歲其壽乃終鬼神更受含毒蛟身毒重還害其身終而復始續受蟒形常食地土萬歲乃畢以瞋恚意向持戒人故受毒身以沙土投鉢中故世世食沙土而死罪畢乃得出生爲人母懷之時常有重病家中日耗生兒頑鈍都無手足其親驚怖宗家皆然曰斯何妖怪當爲不祥即取捐之著于四衢路人往來無不愕然或以刀杖皆擊其頭陷腦窮苦旬月乃死死後鬼神即復更生輒無手足殘頑如前連五百世重罪乃畢後乃爲人常有頭痛之患世尊重曰驚鷺子夫人處世不唯忍所生之處不值佛世違法遠僧常在三塗終而復始輒有劫數若蒙餘福得出爲人稟操

常愚痴虐自隨乃心嫉聖謗毀至尊爲人醜陋衆所惡憎生輒貧窮士不得官願與福違天神聖賢所不祐助夜常惡夢妖怪首尾飛禍縱橫所處不寧心常恐怖斯之所由由不忍伏故使然耳忍惡行者所生常安衆禍消滅願輒如志顏貌晬晬身強少病財福榮尊皆由忍辱慈惠濟衆之所致也忍便爲福身安親寧宗家餘慶未嘗不歡智者深見敬伏安親寧宗其惡心者誤人破家危身爲王所戮地獄燒煮或爲餓鬼亦爲畜生皆心之過世尊又曰寧卧利劍貫腹截肌自投火中慎無履惡寧戴須彌奪毀其命投于巨海魚鼈所吞慎無爲惡矣不知其義慎無妄言佛之明法與俗相背俗之所珍道大所賤清濁異流明愚異趣忠佞相讎邪常嫉正故著欲之

人不好我無欲之行也寧吞然炭無謗三尊
忍之爲明踰於日月龍象之力可謂盛猛比
之於忍萬萬不如一七寶之嚮凡俗所貴然
其招憂以致災患忍之爲寶終始獲安布施
十方雖有大福福不如也懷忍行惠世世無
怨中心恬然衆無毒害世無所怙唯忍可恃
忍爲安宅災怪不生忍爲神鎧衆兵不加忍
爲大舟可以渡難忍爲良藥能濟衆命忍者
之志何願不獲若欲願爲飛行皇帝典四天
下第二天天帝釋及上第六天壽命無極身
體香潔所願自然猶若家物取之即得志願
清淨沙門四道求之可得在已所向吾今得
佛諸天所宗獨步三界忍力所致佛告諸沙
門當誦忍經無忘須臾懷之識之誦之宣之
當宣忍德以濟衆生佛說經竟諸沙門皆大

歡喜作禮而去

佛說羅云忍辱經

當大

十四